

En memoria da

Hanspeter Meiler, Flem, 1946–2023



Hanspeter Meiler ei lunsch entuorn enconuschents sco fundatur e possessur dil Café Crest da Flem, quei vul dir dil café sco era dalla pasternaria, conditoria e confiserie. Igl emprendissadi ha el absolviu en la confisaria Hürsch a Cuera. Suenter dus onns scola mercantila ha el luvrau a Turitg, Berna e Genevra. Bugen raquintava el era dad aventuras en l'Engeltiara. Igl onn 1972 – cun 26 onns – ha el fundau sia fatschenta a Flem. Ord la relaziun cun la consorta Irma ha ei dau quater affons. Igl onn 2009 ha el surdau la gestiun dalla fatschenta a siu fegl Ursin. El sez ei denton restaus cun sia consorta tochen tier sia mort en la fatschenta. Cun la mort da Hanspeter Meiler ha la

Cuminonza Romontscha Flem (CRF) piars ina ferma ustonza per il lungatg romontsch. Dapi 1985 eis el s'engaschaus sco president dil Comité Romontsch, ina organsaziun locala d'antruras dall'Uniuon romontscha Renania. Sia successura, la Cuminonza Romontscha Flem (CRF) ch'ei vegnida fundada 1995 sut el sco president, ha el medemamein presidiau duront biars onns. El ha priu cumiau da sia veta terrestre sco lur president. Omisduas organisaziuns ein s'engaschadas per la tgira dil lungatg romontsch a Flem. Finamira ei stau da coordinar ils interess dils Romontschs da Flem/Fidaz e da promover lur lungatg e cultura els secturs pusseivels dalla veta da mintga gi. Denter auter ei la CRF s'engaschada 1996 per la realisaziun dalla Senda linguistica. Quella ei vegnida renovada e puspei inaugurada da niev 2019. La realisaziun dil monument commemorativ per il poet e scribent indigen Gian Fontana a Fidaz e dil Mir romontsch a Flem ein stadas per Hanspeter Meiler ulteriurs projects da muntada persunala. Alla Renania ha Hanspeter Meiler apparteniu duront biars onns sco consuprastont e cassier. L'attaschonza al lungatg romontsch ha el era practicaus exemplaricamein en sia fatschenta a Flem. El Café Crest vegnan ils products e las specialitads numnadas e descretas per tudestg e romontsch. Hanspeter Meiler ei s'engaschaus sin differents camps dalla veta. Silla

vert professionala eis el sestentaus per ils interess dils pasterners sin palancau cantunal ed intercantunal. Sco commember dalla Societad da musica Flem ha el presidiu comites d'organisaziun da fiastas cantunales e districtualas, da giubileums ed occurrenz localas e regionalas. El


ei denton era s'engaschus sin auters secturs, per exempel sil camp da curling, dils catschadurs ni da patinadi artistic. La veta politica da Flem ha el medemamein persequitau cun viv interess. Malgrad la fleivlezia dalla vesida eis el s'engaschus per sias finamiras tochen la fin da sia veta.

Giosch Gartmann

Hannes Vogel, Maton, 1938–2023

Igls 21 da matg 2023 e igl artist Hannes Vogel mort an la vigliadetgna dad 85 ons. La schlata digl trapasso schass betga schminar sainz'oter c'el e egn Grischùn. Igl Hannes e naschieu igl on 1938 a carschieu sei a Cuira sen la Curt episcopala gest sper la catedrala, sieus bab eara igl ortulan digl santieri da la Curt. Davent digls 1959 â el vivieu a Basilea, igls 1966 e el satratg cun la sia famiglia, la cunsorta Petruschka, lur feglia ad igls dus fegls sur cunfegn, betga lientsch davent, a Village-Neuf an Fràntscha, c'e davanto igl nov domizil da famiglia. Nus vagn ampriu d'ancanuscher la famiglia Vogel a Maton, noua c'ella â cumpro igls 1986 egna tgea istorica. Tocen igls 2004 pendulavan els da la Muntogna da Schons a Village-Neuf, lura âni sacaso definitivameing a Maton.

Hannes a Petruschka ân luvro savens anzemen, igls 2014 en els vagnieus undros par lur prestaziùns artisticas cun igl premi da cultura digl Grischùn. Lur lavurs cumpeglan dissegns, maletgs da calur a diferaintas tecnicas da malagear, instalaziùns, ovras da concezt a video an spazis publics sco parcs near bietgs



publics. A Cuira, agl ur da la veia Loe par sameglia, stat egna lùnga plata da fier, an la quala en taglieus or bustabs par egn vers, near an la hala da la banca da l'UBS eara fixo ved igl plafùn egn complex dad uders da glisch da neon. Rancunaschientscha par las sias lavurs da video sco pionier ad otras ovras da concezt â el cato an emprema lingia an la scena d'art a Basilea, a suainter ear utro, quegl ca instalaziùns agl iester mussan. Divers objects datan ànc oz ad agl avagnir pardetga da la sia creatividad.

Cristian Joos